

14.07.2010 – Ried vum Viviane Loschetter zur Beschäftigungspolitik an zum Chômage.

(Séance publique 44, Compte rendu 17, Page 623)

6147 - Projet de loi portant introduction de diverses mesures temporaires visant à promouvoir l'emploi et à adapter les modalités d'indemnisation de chômage

Mme Viviane Loschetter (*déi gréng*).- Här President, Dir Dammen an Dir Hären, de Virgänger vun dësem Aarbechtsminister hat am Februar 2009 e Gesetz stëmme gelooss, fir duerch transitoresch Mesuren der Finanz- a Wirtschaftskris entgéintzewierken. E reaktiivt Gesetz am Sënn vun: op eppes reagéieren.

Effektiv ass déi lescht Joren am Domän Beschäftigungspolitik vill reagéiert ginn. Oft huet dee viregten Aarbechtsminister sech selwer als Pompjee betitelt. Seng gréissten a sécherlech schwéierst Pompjeesaktioun wor, e Plang opzestellen, fir de Schwieregkeeten entgéintzewierken, déi um Aarbechtsmaart duerch d'Kris opkomm sinn an déi en huet misse meeschten.

Mir hunn dës provisoresh an transitoresch Mesurë matgedroen zu deem Zäitpunkt, well mir och der Meenung woren, datt punktuell finanziell Ënnerstützungsmesurë virun allem a puncto Kuerzaarbecht bei Risiko op konjunkturelle Chômage Sënn gemaach hunn.

Entre-temps no engem décke Joer hu mer en neien Aarbechtsminister an eng nei al Regierung. Mir haten ons net nëmmen als Gréng virgestallt, mä et als absolut Noutwendegkeet ugesinn, datt deen neien Aarbechtsminister a sengem wuelbekanntem Dynamismus eng global Beschäftigungspolitik mat zesammenhängend a vernetzten Aktiounen géif prioritär ausschaffen. Jo, souguer datt e vun där ganzer Regierung deen Optrag géif kréien.

E PAN, e Plan d'Action National, baséierend op eng Evaluatioun vu Besoinen, baséierend op eng proaktiv Beschäftigungspolitik. Eng dynamesch a proaktiv Beschäftigungspolitik, déi ëmgesat gëtt a Kollaboratioun mat der Schoul, zesumme mat den Aus- an Ëmbildungsinstituter, mat der Hëllef vun de Sozialpartner, zesumme mat enger performanter Beschäftigungsinstitutioun, a schlussendlech zesumme mat deenen anere concernéierte Ministèren a Ministerkolleegen.

Mir brauche complémentaire zu de finanzielle Mesuren och eng nei an innovativ Beschäftigungspolitik. Eng Beschäftigungspolitik, déi an d'Mënschen investéiert. Et léisst sech net alles mat Sue regelen, an Zukunft ëmmer manner.

Une voix. - Très bien!

Mme Viviane Loschetter (*déi gréng*).- Dat ass eppes Neies fir ons hei zu Lëtzebuerg, déi duerch seng successiv Politike gewinnt waren, mat Suen alles ze regelen an alles ze léisen. Déi Rechnung geet net méi op. De Motto „Wann ech keng Iddien hunn, da maachen ech et mat Suen“, wäert an Zukunft net méi den Aarbechtsmaart ënnerstëtzen an d'Beschäftigungspolitik och net weiderdriewen.

Voilà! Haut, e Joer nodeem den Aarbechtsminister am Amt ass, stëmme mer e Projet de loi, dee virun engem knappe Mount déposiert ginn ass, an deem, wa mer ganz éierlech sinn, praktesch eng Verlängerung ass vum Gesetz vum viregten Aarbechtsminister, keng wesentlech nei Iddi, keng Innovatioun, keng proaktiv Mesuren, just déiselwecht Iwwergangsmesuren, déiselwecht transitoresch Mesuren.

Wa mer dann nach d'Opportunitéit vun der finanzieller Ënnerstëtzung vum Chômage partiel ënner bestëmmte Bedéngunge bei Betriber, déi vum konjunkturelle Chômage betraff sinn, agesinn, esou kann dat an onsen Aen awer net méi déi eenzeg Form vun Ënnerstëtzung sinn, zumools wou mer gëschter - an et ass schonn hei gesot ginn - vun der Goodyear héieren hunn, datt si erëm op eegene Féiss stinn, Vollzäit schaffen a souguer Leit astellen.

Parallell zu dësem Projet de loi, dee säi Wee duerch d'Chamberskommissioun an duerch de Statsrot gemaach huet, ass de Minister beschäftegt, eng Pressekonferenz ze organiséieren, wou en dem Land déi grouss Reform vum Arbeitsamt annonciert. A mir verstinn lech, Här Minister. Mir verstinn, datt den Aarbechtsminister gläichzäiteg zu de Mesures temporaires, fir dem Chômage entgéintzewierken, och vun där Institutioun wëllt schwätzen, déi fir d'Ëmsetzung vun dëse Mesuren d'Verantwortung muss iwwerhuelen. Dat wär eigentlech e Stéck vum Puzzle vun engem globalen nationalen Aktiounsplang.

Mä net nëmmen huet de Minister d'Chamber an déi zoustänneg Kommissioun - an et ass och scho ganz diplomatesch vu mengem Virriedner suggéiert ginn - net informéiert, och net rapportéiert, a vum politeschen Austausch leider emol guer net ze schwätzen. De Minister annonciert der Chamber, de 60 Deputéierten an dem ganze Land per Pressekonferenz, wat dann elo Tacheles ass aus der Reform vum Arbeitsamt, déi wichteg, noutwendeg an annonciert Reform vun enger wichtiger Institutioun, déi eng eminent wichteg Roll ze spillen huet an dësem Dossier vu Beschäftigungspolitik an Antikrise-Moosnamen.

An de Premier, onsen Här Juncker, huet d'lescht Joer ëm dës Zäit hei annonciert, wat d'Regierung wëlles hat, zumindest virun engem Joer. An ech zitieren lech de Programme gouvernemental: «Création d'un établissement public „Agence luxembourgeoise pour l'emploi“. Afin d'accroître...» - an dat ass d'Argument - «...l'efficacité des politiques actives de l'emploi et d'intermédiation entre offres et demandes d'emploi, le Gouvernement entamera une réforme structurelle fondamentale de l'Administration de l'Emploi, afin de la rendre apte à répondre de manière rapide et flexible aux défis toujours changeants du marché du travail.

Suite aux recommandations du rapport de l'OCDE...» - an et waren der méi - «...sur le service public de l'emploi au Luxembourg, l'Administration de l'Emploi actuelle sera sortie de son carcan d'administration étatique.»

Här President, ech brauch lech jo elo hei net ze soen - a mäi Virgänger huet et och schonn ënnerstach -, datt dës Regierung mat Sécherheet hei an der Chamber eng breet Majoritéit kritt hätt, well praktesch all Partei huet sech fir en Établissement public an eng Restructuration fondamentale vum Arbeitsamt ausgeschwat.

Awer esou ass et net. A mir kënnen, wa mer éierlech sinn, zumindest fir dat, wat mer haut wëssen, net vun enger Reform schwätzen, a scho guer net fir dat, wat mer haut wëssen, vun enger Réforme structurelle fondamentale, well et ännert sech praktesch näischt un där Verwaltung, déi notamment och dës Mesurë muss an d'Praxis ëmsetzen. D'Propos vum Aarbechtsminister: Et behält jiddwereen déiselwecht Struktur, praktesch jiddwereen déiselwecht Aarbecht, et kritt vläicht en neien Numm an et ginn effektiv eng 40 Leit agestellt.

Här President, Dir Dammen an Dir Hären, mir gesi wierklech net, wéi dëst Land sech ka fir déi nächst Generatioun nohalteg opstellen, wa mer et net fäerdeg bréngen, engersäits global a vernetzt ze schaffen, fir déi Créneauen ze erschaffen, déi Aarbecht an onst Land bréngen, déi dozougehéierend Formatioun unzebidden, den noutwendige Suivi ze garantéieren, an déi Institutiounen, déi mer dofir brauchen, och esou performant ze gestalten, datt se kënnen effikass an effizient schaffen.

Hei zape mer nach zousätzlech aus dem Fonds pour l'emploi, mir verschieben eigentlech de Problem vum Chômage op spéider, andeem mer e bezuelen, anstatt e mat den Haren ze huelen. Mir hunn och nach ëmmer keng Perspektive fir ons Jugendlecher, keng visibel Kollaboratioun tëschent de concernéierte Ministeren, keng Ausweitung vum Prinzip vum Consultant, vum Conseiller à l'apprentissage, vun der Beruffsorientéierung an esou weider.

An dobäi hu mir an onsem Land nach esou vill méi Méiglechkeete wéi an onsen Nopeschlänner. Wéi schued ass et eigentlech, datt mer onse Potenzial elo an direkt net ausschöpfen!

Här President, Dir Dammen an Dir Hären, well ons déi finanziell Mesuren, déi hei proposéiert ginn, definitiv net duerginn a well dat Wesentlecht feelt, nämlech de Chômage net ze finanzéieren, mä de Chômage ze bekämpfen, kënne mir dësem Projet de loi net zoustëmmen.

Plusieurs voix.- Très bien!

M. le Président.- Merci der Madame Loschetter. Elo kritt den Här Gibéryen d'Wuert.